

**БОСНА И ХЕРЦЕГОВИНА
ПАРЛАМЕНТАРНА СКУПШТИНА
БОСНЕ И ХЕРЦЕГОВИНЕ**

Делегација у Парламентарној скупштини
Организације за
безбједност и сарадњу у Европи



**BOSNA I HERCEGOVINA
PARLAMENTARNA SKUPŠTINA
BOSNE I HERCEGOVINE**

Delegacija u Parlamentarnoj skupštini
Organizacije za
sigurnost i saradnju u Evropi
Izaslanstvo u Parlamentarnoj skupštini
Organizacije za
sigurnost i suradnju u Europi

PARLIAMENTARY ASSEMBLY OF BOSNIA AND HERZEGOVINA
Delegation to the Parliamentary Assembly of the Organization for Security and Co-operation in Europe

Broj/Broj: 04/3, 03/11-05-1-135/11
Sarajevo/Sarajevo 15.7.2011.

I Z V J E Š T A J
SA 20. GODIŠNJEG ZASJEDANJA PARLAMENTARNE SKUPŠTINE OSCE-a,
BEOGRAD, 6.-10. JULI 2011. GODINE

SARAJEVO, juli 2011. godine

IZVJEŠTAJ O UČEŠĆU STALNE DELEGACIJE PARLAMENTARNE SKUPŠTINE BOSNE I HERCEGOVINE NA 20.GODIŠNJEM ZASJEDANJU PARLAMENTARNE SKUPŠTINE OSCE-a

Jačanje efikasnosti OSCE-a - Novi početak poslije Samita u Astani

U Beogradu je, od 6. do 10. 7. 2011., održano 20. godišnje zasjedanje Parlamentarne skupštine OSCE-a u čijem radu je učestvovala i Stalna delegacija Parlamentarne skupštine BiH, u kojoj su bili: **Mirza Kušljagić**, poslanik u Predstavničkom domu i predsjedavajući Delegacije, **Lazar Prodanović**, poslanik u Predstavničkom i član Delegacije, i **Jelena Rajaković**, sekretar Delegacije.

Ovogodišnje zasjedanje bilo je posvećeno jačanju efikasnosti OSCE-a, a više od 200 delegata iz 50 zemalja razmatralo je 29 prijedloga rezolucija.

Zasjedanje je počelo sastankom Stalnog komiteta koji se sastoji od izabranog skupštinskog rukovodstva i šefova delegacija svih prisutnih zemalja učesnica na Godišnjoj skupštini, **Stalni komitet** Parlamentarne skupštine OSCE-a odobrio je 25 rezolucija za razmatranje na sjednicama tri komiteta. Četiri rezolucije, koje se odnose na pitanje ljudskih prava u Bjelorusiji, trgovinu ljudima, organizirani kriminal i zastupljenost žena u skupštini, delegirane su za razmatranje na plenarnoj sjednici.

Na sastanku su izvještaje i informacije o aktivnostima PSOSCE-a podnijeli: Petros Eftimiu, predsjedavajući PSOSCE-a, Spenser Oliver, generalni sekretar PSOSCE-a, specijalni predstavnici i šefovi posmatračkih misija. Roberto Bateli, šef finansija PSOSCE-a, prezentirao je finansijsku situaciju i nacrt budžeta za narednu fiskalnu godinu.

Plenarno zasjedanje, na kojem se raspravljalo o reformi OSCE-a i jačanju njegove uloge u širenju stabilnosti i sigurnosti u svijetu, počelo je uvodnim obraćanjima: Slavice Đukić-Dejanović, predsjednice Narodne skupštine Republike Srbije, Mirka Cvetkovića, premijera Republike Srbije, Petrosa Eftimiua, predsjedavajućeg PSOSCE-a, Audronijusa Ažubalisa, šefa litvanske diplomatije i predsjedavajućeg OSCE-a, i Lamberta Zanijera, generalnog sekretara OSCE-a,

Predsjednica Skupštine Republike Srbije **Slavica Đukić-Dejanović** izjavila je da je održavanje PSOSCE-a u Beogradu priznanje Srbiji, kao osnivaču te organizacije i državi koja dosljedno provodi u djelo osnovne postulate OSCE-a.

Đukić-Dejanović navela je da su u proteklim godinama uloženi značajni naponi u sprečavanju konflikata i kriznih situacija, kao i u jačanju demokratskih kapaciteta, dostizanju visokih standarda tokom izbornih procesa, u podsticanju vladavine prava, poštivanju ljudskih i manjinskih prava i u njegovanju kulture međusobnog uvažavanja država članica i drugih država.

Teme koje su se našle na dnevnom redu ovogodišnjeg zasjedanja, kao što je trgovina ljudskim organima, pouke iz stradanja Jevreja u Drugom svjetskom ratu, ali i rodna ravnopravnost, prema ocjeni Đukić – Dejanović, svjedoče o razvoju OSCE-a.

Premijer Srbije **Mirko Cvetković**, pozdravljajući delegate, rekao je da je Srbija duboko privržena principima, vrijednostima i standardima OSCE-a i da tu organizaciju smatra strateškim partnerom u suočavanju s novim prijetnjama i izazovima poput međunarodnog terorizma, organiziranog kriminala, trgovine ljudima, energetske sigurnosti, klimatskih promjena.

On je istako da je Srbija čvrsto opredijeljena da doprinese unapređenju procesa saradnje i obnovi povjerenja u regionu, kao i aktivnom rješavanju svih otvorenih pitanja. Cvetković je naveo da je uloga OSCE-a i njegovih misija posebno značajna u rješavanju regionalnih problema.

Cvetković je dodao da je Misija OSCE-a u Srbiji, koja je nedavno obilježila desetu godišnjicu rada, doprinijela provođenju reformskih procesa, dostizanju i utemeljenju evropskih vrijednosti i demokratskih standarda.

Predsjednik PSOSCE-a **Petros Eftimiu** istakao je da je OSCE u krizi, navodeći da postoje mnogi "međunarodni igrači" i organizacije koje i ne pominju OSCE. On je podsjetio da na samitu NATO-a, kada je bilo riječi o saradnji, OSCE nije ni spomenut, te da je ista situacija i s Evropskom unijom. On je istakao uspjeh OSCE-a u jugoistočnoj Evropi kao model prema kojem ta organizacija treba da postupa i u drugim dijelovima svijeta.

Predsjedavajući OSCE-a šef litvanske diplomatije **Audronijus Ažubalis** istakao je da je neophodna regionalna saradnja i politička hrabrost u rješavanju zamrznutih konflikata.

On je pozdravio predsjednike Srbije i Hrvatske, Borisa Tadića i Ivu Josipovića, kao i druge lidere koji su, kako je naveo, hrabro pružili ruku jedni drugima i premostili praznine koje je stvorio rat i krenuli pozitivno u budućnost.

Ažubalis je dodao da je OSCE ponosan na ulogu koju je imao u tome te da je to najbolji primjer djelotvornosti OSCE-a".

On je istakao da treba biti veoma hrabar u gonjenju svih koji su počinili zločine, kao što je Ratko Mladić, i ispunjavanju te obaveze da se izvedu pred lice pravde. Ažubalis je ocijenio da je to znak poštovanja susjeda koji je značajno doprinio regionalnoj stabilnosti.

Predsjedavajući OSCE-a istakao je da regionalna saradnja ne počinje na terenu, već "u glavama i srcima". "Kada lideri mogu da pokažu političku hrabrost i pruže ruku jedni drugima i saraduju, tada regionalna saradnja i napredak postaju mogući", objasnio je Ažubalis.

Generalni sekretar OSCE-a **Lamberto Zani** je u obraćanju istakao prioritete svog budućeg djelovanja koji uključuju traženje mogućnosti za maksimalno jačanje efikasnosti i efektivnosti OSCE-a. On je zatražio pružanje podrške zemlji koja predsjedava OSCE-om, kako bi se ostvarili ciljevi te organizacije.

U nastavku plenarnog zasjedanja delegati su razmatrali rezolucije o Bjelorusiji, borbi protiv transnacionalnog organiziranog kriminala, provođenju globalnog plana Ujedinjenih naroda o borbi protiv trgovine ljudima i zastupljenosti žena u Parlamentarnoj skupštini OSCE-a.

Komiteta za politička pitanja i sigurnost razmatrao je rezoluciju „Jačanje djelotvornosti i efikasnosti OSCE-a- Novi početak nakon samita u Astani”.

U rezoluciji se izražava žaljenje zbog neusvajanja Akcionog plana na samitu u Astani, koji je trebalo da osigura jasnije smjernice za predstojeće aktivnosti OSCE-a. Izražena je i zabrinutost zbog toga što nije napravljen pomak u rješavanju dugotrajnih sukoba na teritoriji OSCE-a, te zbog nepostojanja konsenzusa o više političkih pitanja. Zatražena je ponovo reforma OSCE-a, kako bi se omogućila veća transparentnost i odgovornost time što će sastanci Stalnog komiteta biti otvoreni za javnost i medije, i time što će se zahtijevati da ona zemlja koja onemogućuje ostvarivanje konsenzusa učini to otvoreno i bude spremna da brani svoj stav.

Istaknuto je da su promjene sigurnosnog okruženja do kojih je došlo posljednjih godina, zajedno s neravnomjernom stopom integracije, ekonomskog rasta i demokratskog razvoja, kao i pitanje sigurnosti hrane, doveli do novih problema u postizanju sveobuhvatne sigurnosti kojom OSCE treba da se bavi.

Na sjednici je pozdravljeno hapšenje haškog optuženika Ratka Mladića i njegovo prebacivanje u Tribunal. U izjavi pod tačkom 13. pozdravljeni su oni koji su godinama radili

na tome da Mladića privedu pravdi i na taj način pružili utjehu preživjelim žrtvama, doprinijeli regionalnoj stabilnosti i pomirenju, unaprijedili izgleda za evropske integracije i podstakli na dalje napore kako bi pravdi bili privedeni svi odgovorni za zločine počinjene tokom sukoba na Zapadnom Balkanu.

Na zasjedanju je izražena i zabrinutost zbog povećanih tenzija u Nagorno-Karabahu i pozvano na pojačane političke napore u okviru OSCE-a kako bi bili riješeni zamrznuti sukobi u toj oblasti, kao i u Moldaviji i Gruziji.

Komiteo za ekonomske poslove, nauku, tehnologiju i okoliš razmatrao je rezoluciju kojom se pruža aktivna podrška konceptu, koji je OSCE usvojio, a koji se odnosi na zajedničku, sveobuhvatnu i nedjeljivu sigurnost koja obuhvata humanu, ekonomsku i ekološku dimenziju. Konstatirano je da su posljedice ekonomske krize imale nesrazmjern uticaj na najosjetljivije pripadnike društva, uključujući migrante, žene, mlade i pripadnike manjinskih grupa. Pozdravljena je uloga koju OSCE može odigrati u ekološkoj sigurnosti, kao i njegov komplementaran rad s Ujedinjenim narodima u borbi protiv klimatskih promjena. Predloženo je da se OSCE preporuča kod država članica kao vodeća međunarodna organizacija, ne samo u sferi demokratizacije, slobodnih izbora i poštivanja ljudskih prava, već i u pogledu pitanja kao što je sprečavanje tenzija u vezi s energetsom sigurnošću u regionu OSCE-a. Također je preporučeno zemljama članicama OSCE-a da u tom regionu pojačaju procese stvaranja otvorenih, integriranih tržišta koja funkcioniraju na osnovu zajedničkih pravila, što bi moglo dodatno unaprijediti ekonomsku saradnju i integraciju u regionu OSCE-a.

Komiteo je usvojio preporuke kojima je pozvana međunarodna zajednica da se uključi u proces završetka konstrukcije novog „sarkofaga“ oko nuklearke u Černobilu, kao i da se pruži podrška aktivnostima na zaštiti područja pogođenih nuklearnom katastrofom iz 1986. godine.

Na sjednici **Komiteta za demokratiju, ljudska prava i humanitarna pitanja** razmatran je i Nacrt rezolucije o borbi protiv nelegalne trgovine ljudskim organima, koji je podnijela Suzana Grubješić, šef stalne delegacije Narodne skupštine Republike Srbije u Parlamentarnoj skupštini OSCE-a.

Ona je predstavila Nacrt rezolucije, kojom se preporučuje da se hitno provede sveobuhvatna i nezavisna međunarodna istraga o otmicama i zločinima, koja će, u saradnji s UNMIK-om, EULEKS-om i drugim relevantnim institucijama, osigurati informacije, činjenice i dokumente o zločinima otmice i nelegalne trgovine ljudskim organima na Kosovu i Metohiji, objasnila je Grubješić. Šef delegacije Srbije naglasila je da je mandat Vijeća sigurnosti jedini način da se garantira da istraga neće biti ograničena pitanjima mandata ili jurisdikcije – jer EULEKS nema pravo da istražuje izvan Kosova, a bez mandata Vijeća sigurnosti, druge države neće imati razlog da ih puste da istražuju na njihovoj teritoriji. Mandat Vijeća sigurnosti ključan je za uspjeh istrage i neodvojivi je dio zahtjeva za pravdom, zaključila je Grubješić. Ona je tokom izlaganja pozvala PSOSCE-a da u potpunosti podrži aktivnosti specijalnog predstavnika i koordinatora OSCE-a za borbu protiv trgovine ljudskim organima, kao i da predloži da OSCE istraži i zabilježi slučajeve ilegalne trgovine ljudskim organima na području koje pokriva, s ciljem pripreme studije u kojoj će ukazati na obim tog zločina.

Nakon istupanja šefa delegacije Srbije, otvorena je diskusija tokom koje su prisutni delegati osudili ubistvo pojedinca radi trgovine organima, ukazujući da je to zločin protiv čovječnosti. Šef delegacije Holandije u Parlamentarnoj skupštini OSCE-a **Češkun Čeruz** izjavio da će ta zemlja podržati rezoluciju o trgovini ljudskim organima, koju je podnijela Srbija i ocijenio da je riječ o stravičnim zločinima kojima se mora stati na put.

Čeruz je naglasio da je potrebno da svih 56 zemalja članica OSCE-a upute politički signal protiv trgovine ljudskim organima, te da se mora uložiti sva energija i politička volja u borbu protiv tog oblika kriminala. On je istakao da treba razmotriti na koji način bi borba protiv toga bila efikasna, kao i da bi konkretne akcije trebalo da budu pretočene u zakon.

Član delegacije Rumunije **Viktor Dobre** izrazio je zadovoljstvo što je OSCE imao snage da se suoči s ovako izazovnom temom, istakavši da je to oblik najtežeg zločina protiv čovječnosti. On je podržao uključivanje specijalnog predstavnika OSCE-a za borbu protiv nezakonite trgovine ljudima u ovaj slučaj.

Predsjedavajući delegacije SAD-a **Benjamin Kardin** istakao je snažnu podršku nezavisnoj i temeljitoj istrazi, dodavši kako smatra je uključivanje Vijeća sigurnosti UN-a u istragu moguće, ali da sad treba koristiti postojeće mehanizeme kao što je EULEX.

Član delegacije Francuske izrazio je svesrdnu podršku borbi protiv nezakonite trgovine ljudima i ljudskim organima, istakavši da su, osim istraga pod okriljem EULEX-a, neophodne i dodatne istrage.

Predsjedavajuća delegacije Austrije **Barbara Pramer** istakla je da odgovorni za te zločine moraju da budu kažnjeni, te da podržava rezoluciju koju je podnijela srpska delegacija.

Šef delegacije Albanije **Aldo Bumči** rekao je da je Albanija posvećena punoj saradnji i da želi da se što prije dođe do jasnih i brzih odgovora.

Predsjedavajući delegacije Velike Britanije **Piter Batomli** čestitao je Srbiji na velikom napretku i istakao neophodnost istrage o zločinu trgovine ljudskim organima.

Član delegacije Italije izrazio je nadu da su svi svjesni značaja ovog pitanja, te da niko ne smije da zatvara oči pred takvim zločinom. On je istakao da osuda treba da bude jasna i da se nada kako će rezolucija biti usvojena jednoglasno.

Nakon diskusije, prešlo se na razmatranje četiri amandmana koje su uložili parlamentarci OSCE-a na Nacrt rezolucije. Od podnesenih amandmana Komitet za demokratiju, ljudska prava i humanitarna pitanja prihvatio je jedan na član 15. Nacrta rezolucije. Nacrt rezolucije prihvaćen je sa samo jednim glasom protiv (Aldo Bumči, Albanija).

U nastavku zasjedanja Komitet je zaključio da su najnovije demokratske revolucije u Sjevernoj Africi i na Bliskom istoku od velikog značaja za zemlje s prostora OSCE-a, jer one mogu inspirirati ljude iz tih država da traže veći stepen demokratije, vladavine zakona i ljudskih prava.

Pozvano je i na istragu navoda o kršenju ljudskih prava u Bjelorusiji, kao i na veći broj bilateralnih i regionalnih kontakata s parlamentima u regionu Centralne Azije, naročito s parlamentom Kirgizije, gdje je prošle godine bilo etničkih sukoba.

U oblasti zaštite ljudskih prava pozvano je na borbu protiv trgovine ljudskim organima, jačanje borbe protiv rasizma i ksenofobije, protiv međunarodnog kidnapovanja djece koje čine roditelji, borbu protiv transnacionalnog organiziranog kriminala, borbu protiv trgovine ljudima, program zaštite svjedoka .

U nastavku **plenarnog zasjedanja** razmatrane su rezolucije o Bjelorusiji, borbi protiv transnacionalnog organiziranog kriminala, provođenju globalnog plana Ujedinjenih naroda o borbi protiv trgovine ljudima i zastupljenosti žena u Parlamentarnoj skupštini OSCE-a. Parlamentarna skupština OSCE-a pozvala je vlasti Belorusije da prekinu represiju nad pripadnicima opozicionih stranaka i poručila da je održavanje slobodnih i poštenih izbora u budućnosti od velikog značaja za odnose te organizacije i Minska.

U rezoluciji koju je podnijela njemačka poslanica Uta Capf poziva se na provođenje nepristrasne međunarodne istrage optužbi da su zatvorenici u toj zemlji, koji su pobjegli u inozemstvo, bili mučeni u zatvorima nekadašnjeg KGB-a.

Parlamentarna skupština OSCE-a ponovo je pozvala vlasti u Bjelorusiji da omoguće ekspertima OSCE-a ulazak u zemlju.

Poslanici su izrazili žaljenje što izbori u decembru prošle godine nisu bili slobodni i naveli da je u postizbornim protestima 600 ljudi uhapšeno, među njima i nekoliko predsjedničkih kandidata.

Poslanici su preporučili vlastima da ne vrše pritisak na medije i da u budućnosti omoguće slobodno održavanje miroljubivog okupljanja ljudi.

Pored te rezolucije, poslanici su usvojili i rezoluciju o borbi protiv organiziranog kriminala, trgovine ljudima i rezoluciju o zastupljenosti žena u Parlamentarnoj skupštini OSCE-a.

Italijanski poslanik Rikardo Miljori pozvao je zemlje članice OSCE-a koje još nisu ratificirale Konvenciju UN-a protiv međunarodnog organiziranog kriminala da to što prije učine.

Poslanici su ocijenili da je potrebno da zemlje članice ojačaju svoje zakonodavstvo radi borbe protiv organiziranog kriminala, u skladu s Konvencijom, kao i da usklade zakonodavstva.

Rezolucija o borbi protiv trgovine ljudima predviđa punu i efektivnu realizaciju Globalnog akcionog plana UN-a za borbu protiv trgovine ljudima i poziva države da poboljšaju saradnju s ciljem da se stane na put tim kriminalnim aktivnostima.

Rezolucija o zastupljenosti žena u nacionalnim delegacijama Parlamentarne skupštine OSCE-a predviđa povećanje broja žena u delegacijama zemalja članice ove organizacije.

U nacrtu koji je podnio španski poslanik Horhe Giljot navedeno je da su, prema podacima iz februara ove godine, svega 23,7 posto poslanika žene i da su u 17 delegacija zastupljeni isključivo muškarci.

U pauzi zasjedanja, organizirana je panel-diskusija PSOSCE-a o borbi protiv nelegalne trgovine ljudskim organima, u kojoj su učestvovali šef delegacije Narodne skupštine Republike Srbije u PSOSCE-a Suzana Grubješić, ministar vanjskih poslova Srbije Vuk Jeremić, zamjenik tužioca za ratne zločine Bruno Vekarić i predsjednik Komisije Vlade Srbije za nestala lica Veljko Odalović.

Ministar vanjskih poslova Srbije **Vuk Jeremić** naglasio je da se radi o stravičnoj praksi do sada nezabilježenoj u analima brutalnih ratova u Evropi. Ukoliko se ove tvrdnje dokažu, OVK će biti optužena za jednu potpuno novu kategoriju ratnih zločina - ili, kako je definirano u nacrtu rezolucije, za ekstreman zločin protiv čovječnosti, dodao je Jeremić. Ministar je izrazio uvjerenje da ne smije biti nikakve sumnje u pogledu toga da se ovakve optužbe moraju detaljno istražiti te da je za taj zadatak neophodan mandat Vijeća sigurnosti Ujedinjenih naroda.

Bruno Vekarić ocijenio je da je suština nezavisne istrage o nelegalnoj trgovini ljudskim organima na Kosovu i Metohiji "siguran svjedok" i da se mora osigurati potpuna zaštita svjedoka ako se želi doći do istine o zločinima. On je podsjetio na ubistva više svjedoka u slučaju vođenom pred Haškim tribunalom protiv Ramuša Haradinaja, te istakao da je Tužilaštvo nedavno pronašlo Albanca koji bi mogao da bude svjedok, a koji živi u Evropi, ali ga je strah da svjedoči budući da mu porodica živi na Kosovu. On je pozdravio to što Parlamentarna skupština OSCE-a raspravlja o ovoj temi, ali i postavio pitanje da li je bilo potrebno čitavih 12 godina da se otvore tako zanačajna pitanja. Vekarić je dodao da se posebna pažnja mora usmjeriti ka žrtvama koje nemaju porodice koje bi se interesirale za njihovu sudbinu i podsjetio na 48 hendikepiranih lica iz bolnice u Štimlju, koja su tokom jedne noći nestala bez traga. On izrazio bojazan da se neće moći ništa učiniti kada međunarodna istraga pronađe tijela žrtava i kada poželi da ih uporedi s DNK nalazima pronađenim u 'žutoj kući' - simbolu trgovine organima na Kosovu, jer su materijalni dokazi uništeni u Haškom tribunal.

Predsjednik Komisije Vlade Srbije za nestala lica **Veljko Odalović** izjavio je na panelu Parlamentarne skupštine OSCE-a da će istraga o nelegalnoj trgovini ljudskim organima na Kosovu i Metohiji dovesti do razrješenja sudbine velikog broja nestalih, kojih ima 1.809. On je ponovio da istraga treba da bude međunarodna i nezavisna.

Posljednjeg dana zasjedanja usvojena je Beogradska deklaracija, u koju su uvrštene 23 rezolucije, prethodno usvojene na sjednicama tri komiteta. U preambuli Deklaracije navedeno je da su se parlamentarci okupili u Beogradu kako bi razmotrili dostignuća i izazove u vezi sa sigurnošću i saradnjom, a naročito jačanje efektivnosti i efikasnosti te organizacije, koja okuplja 56 zemalja.

U poglavljima jedan, dva i tri navedene su redom deklaracije i preporuke Komiteta za politička pitanja i sigurnost, Komiteta za ekonomska pitanja, nauku, tehnologiju i okoliš i Komiteta za demokratiju, ljudska prava i humanitarna pitanja, namijenjene narednom Ministarskom savjetu te organizacije koji će se sastati u Viljnusu, u decembru ove godine. Usvajanje Beogradske deklaracije trebalo bi da doprinese oblikovanju politike OSCE-a i nacionalnih zakonodavstava.

- IZBORI I IMENOVANJA

Na ovom zasjedanju za predsjednika Parlamentarne skupštine OSCE-a reizabran je Petros Eftimiu (Grčka).

Tri potpredsjednika Parlamentarne skupštine OEBS-a koji su izabrani na trogodišnji mandat su :

- Vofgang Grosruk, Austrija
- Valburga Habsburg Daglas, Švedska
- Tonino Picula, Hrvatska

Tokom 19. godišnjeg zasjedanja Parlamentarne skupštine OSCE-a izabrana su nova rukovodstva komiteta:

- Komitet za politička pitanja i sigurnost

Karl-Georg Velman, Njemačka (predsjednik)

Suzan Bratli, Norveška (potpredsjednik)

Vilija Alkenaitė, Litvanija (izvjestilac)

- Komitet za ekonomske poslove, nauku, tehnologiju i okoliš

Serhij Ševčuk, Ukrajina (predsjednik)

Brus Hajer, Kanada (potpredsjednik)

Toni Lojd, Velika Britanija (izvjestilac)

- Komitet za demokratiju, ljudska prava i humanitarna pitanja

Mateo Mekaći, Italija (predsjednik)

Alan Neri, Francuska (potpredsjednik)

Češkun Čeruz, Holandija (izvjestilac)

Sekretar
Delegacije PSBiH u PSOSCE
Jelena Rajaković

Dostaviti:

- Kolegijumu Predstavničkog doma
- Kolegijumu Doma naroda
- Komisiji za spoljne poslove Predstavničkog doma
- Komisiji za spoljnu i trgovinsku politiku Doma naroda
- Članovima delegacije PSBiH u PSOEBS-u
- Sektoru za međunarodne odnose i protokol

Kopija: Ministarstvo inostranih poslova BiH

Hapomena: Izvještaj odobrio Mirza Kušljagić, predsjedavajući Stalne delegacije PSBiH u PSOEBS-u

